

欽定剿平粵匪方略

欽定剿平粵匪方略卷二十 壬子年

十一月十九日 乙丑 常大滄雙福奏言賊船於十

二日辰刻馳至武昌省城江面當經兩岸開放

大礮並師船開礮迎擊打沈划船無數詎該匪

繞登對岸攻撲漢陽府城經一晝夜尙無確信

旋據探報又有股匪約六七千人由蒲圻陸路

竄下直抵省城東門外分作兩翼撲來臣等卽

於城上開礮抵禦擊斃賊匪數十名旋退踞洪
山一帶查該匪自湖南竄入益陽後由小路攻
撲岳州占踞府城搶擄商船加以沿途土匪引
導旬日間水陸猝至情勢猖獗已極而湖北存
城官兵及陝甘續到者僅止三千餘名其湖南
派來總兵常祿王錦繡所帶兵二千七百餘名
因在中途被賊截擊衝散實僅到省一千餘名

合計官兵止五千有餘分布城垛臣等會同該
總兵等與文武各官晝夜駐城督率兵勇誓以
死拒惟賊衆數萬同時水陸猝至四面環攻實
屬萬分危急相應請

旨飭下徐廣縉等迅卽帶兵來北不勝懸望迫切之至
再賊船灣泊省城上游之十餘里約數百號俱
安有礮位所載軍火糧食甚爲充足兩岸對渡

又便於接應我兵水陸俱被截斷糧運不通必須先將大小賊船剿盡方可制勝聞湖南大營帶有粵西礮船應請

飭飛調來北助剿至下游江西安徽各省急須嚴行堵禦該匪早有直竄南京之說應請

飭調江南水師廣艇礮船並中號小號礮船多隻攔截九江順風逆溯武昌一路迎頭截擊不特可遏

其下竄並可斷賊兩岸接應去其糧食勦辦方能得手至武昌省城食用等物向俱仰給漢鎮店市及客商貨船今因賊匪猝陷岳州連船下竄所有店貨商船逃徙一空錢米油燭等物無從購辦又水陸梗塞更難轉運進城應請

飭下湖南糧臺多爲購辦來北及探查轉運路徑以資接濟

同日安徽巡撫蔣文慶奏言探聞逆匪有由臨
湘縣分撲武漢地方之說恐其順流直下安徽
爲東南數省門戶其與湖北交界之六安霍山
英山宿松太湖等處犬牙相錯路徑紛歧水陸
要隘不一而足亟應派兵防守以免竄入惟本
省各營官兵已經節次調赴粵楚等省防堵省
垣爲根本重地存兵不過數百名宿松縣之小

孤山爲皖蘇咽喉非派重兵駐守不足以資防
禦統計安徽一省可調之兵不及二千名實形
單薄除飛調徽甯等營官兵一千五百名移咨
壽春鎮臣恩長來省統帶並咨督臣陸建瀛於
江蘇水陸各營選派精兵三千名浙江省添派
精兵一千名同前備調兵一千名配齊軍裝器
械選派得力將弁飭令無分雨夜兼程來皖聽

候分撥外第思南省官兵較輒必須參用北省勁旅方足以資捍衛相應請

旨飭下山東撫臣移緩就急挑選精壯兵丁二千名派

將統帶由宿州馳至皖省防禦以安江境均奏
入

上命軍機大臣傳諭徐廣縉羅繞典張亮基常大滄雙
福曰自逆匪竄入岳州卽由六百里加緊諭令徐廣

縉迅統大兵馳赴岳州迤北一帶督剿該大臣諒已
剋期赴援惟賊船已於十二日至武昌省城江面復
繞登對岸攻撲漢陽府城又有股匪六七千人由蒲
圻陸路竄下直抵省城東門外分作兩翼撲城賊勢
猖獗已極湖北存城官兵僅五千有餘情形甚屬危
急武昌重地且爲南北咽喉豈容稍有疏虞徐廣縉
務當統帶官兵星速北來並飛催統領官兵之向榮

及各帶兵大員帶領兵勇兼程前進救援武昌萬不可稍有耽延再誤事機常大瀄雙福駐紮省垣守城是其專責務須督飭在城文武紳民竭力守禦以待援兵並隨時嚴查城內居民無令奸匪潛入漢陽與武昌僅隔一江唇齒相依亦須飭令該城文武並紳民人等合力固守就近爲武昌聲援據常大瀄奏湖北口糧無從購辦請飭湖南糧臺多爲備辦又湖南

大營帶有粵西礮船請飛調來北助剿各等語著徐廣縉卽照該撫所請酌量妥速辦理毋稍貽誤

上又命軍機大臣傳諭陸建瀛蔣文慶曰現在逆匪竄踞岳州直犯武昌勢甚猖獗沿江各省均須急籌防堵據蔣文慶奏安徽地處下游請調江蘇水陸各營精兵三千名陸建瀛諒已據咨調往陸建瀛現任豐工督率彈壓正當喫緊之時惟安徽江西俱係該督

兼轄省分儻軍情緊急必須親往督辦卽著扼要駐紮以資調度常大瀄等請調江南水師廣艇礮船並
中號小號礮船多隻攔截九江順風逆溯武昌一路
迎頭截擊著該督酌量緩急無分畛域合力堵截並
著該督撫等分飭地方文武大員於沿江水陸要隘
節節嚴防毋得稍有疏失

上又命軍機大臣傳諭李德曰現在賊匪已竄至武昌

據蔣文慶奏安徽逼近湖北急應防堵著李德移緩就急迅挑精壯兵丁二千名派得力將弁統帶由宿州星馳赴皖以資防禦儻山東有須添兵之處朕不難再由鄰省調往也

同日署河南巡撫琦善奏言臣仰蒙

恩旨署理河南巡撫連日將調兵籌堵各事次第辦理竊念賊匪竄踞岳州督臣徐廣縉等集兵攻剿

自可剋期收復惟賊勢方張難保不四面竄突
江南江西一帶尙有長江天險可以扼要嚴防
河南則地處曠平南汝二郡及光州一州在在
與楚界緊接南陽又爲荆襄上游當奔竄之衝
萬一賊蹤闌入不特一省腹地滋擾且與直隸
毗連關繫尤屬匪淺當此防堵喫緊之際必須
多集兵力更宜先選精銳昨蒙

簡派多兵俾資調遣不勝欽感惟尙須酌請添調並指
營調派以期得力擬請

派調吉林黑龍江馬隊各二千名直隸督標古北口提
標兵各二千名正定鎮屬之龍泉倒馬固關三
營兵共一千名大名鎮標兵一千名陝西漢中
陝安二鎮甘肅督標兵各一千名並請

飭該督撫提鎮逐加挑選以收勁旅之用再現當軍興

之際首以恤兵安民爲重兵丁現已議加體恤
溫飽有資如再有絲毫擾累民間一經百姓喊
控卽當以軍法從事而沿途各州縣辦差丁役
更不得私借兵差名目向閭閻濫行苛派如有
前項弊端准令百姓指告將丁役從重治罪州
縣一併叅處並請

飭下經過地方各督撫將現辦情形剴切出示曉諭奏

八

上諭內閣曰琦善奏請添調精兵以資調遣卽著訥爾
經額挑選直隸督標提標精兵各二千名正定鎮屬
之龍泉倒馬固關三營精兵共一千名大名鎮標精
兵一千名舒興阿張祥河挑選陝西漢中陝安二鎮
精兵各一千名甘肅督標精兵一千名迅派得力將
弁管帶均交琦善調遣現在賊由岳州竄至湖北武

昌漢陽一帶地方朕已命徐廣縉督飭向榮等統領
大兵飛速應援鄰近省分亦命該督撫嚴兵固守著
琦善迅卽馳赴河南統帶新調精兵協力防剿並著
嚴飭帶兵各員務各約束兵丁於經過地方毋得藉
端訛索擾累民間如有多用民夫需索使費諸弊端
卽著按照軍律懲辦沿途各督撫等並著一體嚴查
儻州縣辦差丁役有藉兵差名目濫派閭閻者除將

該丁役從重治罪外並將該州縣嚴行衆處毋稍徇
隱

琦善又奏言現在請調之兵已有萬餘名口食
之需必須按日給發儘調兵陸續到齊而餉糈
或有不給未免軍心先懈更啟賊匪窺伺之端
自須籌備於前以冀糧足兵精一鼓作氣應請
飭下部臣早爲籌撥俾得應時給發不致有停兵待餉

之虞奏入

上命軍機大臣傳諭戶部曰現在賊竄湖北軍需緊要河南防堵亦需重兵一切供支款項均須急籌著戶部迅速籌撥餉銀二百萬兩分解軍營及河南聽候撥用

二十日

丙寅

署河南巡撫陸應穀奏言探聞賊匪

於初三日竄入岳州該處距武昌省城甚近岳

州被擾荆襄鄖陽一帶處處戒嚴豫省南汝光
各府州屬與湖北毗連計武昌至信陽州僅數
百里而南陽府屬之新野縣水陸皆通均屬緊
要臣當先派撫標官兵二百名前赴信陽州一
面飛調護理河北鎮總兵崇安帶領精兵一千
名馳往該州駐紮防禦並咨南陽鎮總兵柏山
派委將備帶兵三百名前赴新野縣扼要駐守

河南兵額本屬不多且經調赴粵楚三千三百
餘名此時省城統計滿營撫標開封城守各營
除調出之外不足二千名而歸德考城兩營又
與江南山東接壤現在豐北業已開工須資彈
壓其餘南北兩鎮所屬亦形單薄無可調派賊
情逼近武昌情形緊迫不能不調鄰省官兵協
力堵禦相應請

旨飭下山東撫臣選派精兵一千名山西撫臣選派南鎮精兵三千名各派曾經出師得力鎮將管帶迅速來豫俾資防堵奏入

上命軍機大臣傳諭陸應穀曰河南與湖北毗連地方甚多水陸皆通在在堪虞此時逆匪圍撲武昌漢陽勢甚緊急南省追兵計日趕到合力夾擊難保不再圖北竄該署撫現在派撥官兵於信陽新野等要隘

防堵惟兵力尙單所調鄰省之兵一時未能趕到著陸應穀於河南各營再行抽調一二千名迅速派往交界處所擇險布置該署撫如須出省調度卽著擇要前往駐紮俟琦善到日再行來京

上又命軍機大臣傳諭李德郭夢齡曰湖北賊勢猖獗河南急應防堵著李德選派山東精兵一千名郭夢齡選派山西南鎮精兵三千名各派曾經出師得力

鎮將管帶馳赴河南以資防守

同日

上諭內閣曰前因岳州失守將派往防堵之湖北提督
博勒恭武先行革職並交徐廣緒查明該革員是否
禦賊受傷又諭令將棄城逃走各員一併嚴行查辦
守土各官遇有賊匪竄擾如能相機籌度或嬰城固
守或出城奮擊文武各盡職守何至任賊橫行毫無

阻遏近日地方惡習一聞警報藉詞防堵出城規避
前已降旨飭令該大臣督撫等隨時查辦因思帶兵
員弁遇有要隘可扼仍須督兵堵剿又豈可藉詞退
避城中棄險不守現在賊匪經過處所如有出城逃
避員弁卽當按律懲辦儻臨陣畏葸不出以致棄險
失機者亦應查明嚴叅治罪以肅軍律毋稍徇將
此通諭知之

二十三日己巳

上命軍機大臣傳諭徐廣縉常大瀄曰逆匪自岳州竄
徧湖北省城圍撲漢陽及龜山營盤情形緊急數日
來未得徐廣縉奏報朕心實深焦灼疊經降旨令向
榮趕緊赴援並令徐廣縉督飭大兵星速前進不知
此時如何攻剿向榮雖經獲咎而該大臣仍令其統
領諸軍朕亦念其前守桂林之勞停其發遣俾令趕

赴長沙協同固守兩月以來尙無貽誤此次賊匪北竄岳州向榮不能迅追救援而其趕派常祿王錦繡帶兵星馳赴援武昌到在賊前見事尙屬機警向榮久於行陣此時武昌戒嚴正伊奮激圖報之日如能迅速勦賊不但可贖前愆並可重邀恩眷著徐廣縉卽將此旨宣示向榮俾知感勵朕用人一秉大公功罪皆由自取想該革員必能仰體朕始終成全之至

意也

二十五日辛未陸建瀛奏言探聞該匪竄至岳州

武昌漢陽均已戒嚴查江西之九江府陸路則與武昌府毗連長江則與黃州府接壤卽應水陸兼防以備不虞而防江之法惟有於漢口以下迤邐至黃州府屬之蘄州廣濟等縣察看江岸寬窄約計礮力能及處所節節設備庶有把

握前准署江西撫臣張芾咨調鎮江三板船四隻臣已飛飭守備方翔統帶兼程駛往其陸路應以瑞昌等縣爲要隘防兵尙恐單薄可否

飭下徐廣緒體察現在賊情迅撤長沙之兵由江西徑赴武昌迎頭截擊爲上援湖北下顧江西之計其湖北省派防湖南交界之兵現似當同守漢陽一帶臣已飛咨署江西撫臣張芾前任刑部

尙書陳孚恩探明實在情形不分畛域以援應
湖北爲自守計若關入九江則無要隘可扼矣
至安徽省雖又在江西之下游而順流而下片
帆直達安徽撫臣已於小孤山兩岸安兵設礮
僅可以守陸路賊若由水路東下恐不足恃查
該省額兵本屬無多又調赴廣西湖北江西防
剿者三千名該逆儻已竄至湖北則湖南軍營

大兵必追逐而下是湖北不患無兵可否將前
此調赴廣西湖北之安徽官兵一併撤回臣已
飛咨徐廣縉酌量辦理江蘇省人情本屬柔懦
湖南北避難東下者非居江甯卽赴揚州訛言
日至勢將不可復遏臣急應馳回省城彈壓撫
綏一面溯流而上由安徽以至九江會同署江
西撫臣等妥爲籌辦惟豐工正在喫緊現在趕

緊趨辦一俟合龍卽行星馳回省察看情形酌量進止

同日張芾奏言探聞賊匪竄擾岳州武昌戒嚴伏查九江居武昌之下游爲吳楚咽喉重地如果賊到武昌擄掠民船順流而下數日可到現委臬司惲光宸帶領文武員弁及團勇五百名前往往九江會同該護鎮道等妥籌防守臣仍當

隨時察看緩急馳赴督防以顧大局其九江上游對岸之武穴鎮係湖北地面業經江西撥兵往駐不敢稍存畛域之見均奏入

上命軍機大臣傳諭陸建瀛楊文定蔣文慶張芾陳孚恩曰現在賊匪攻撲武昌及漢陽一帶其下游各省處處可通急應嚴密防堵俾不至分路竄擾而江西之九江府水陸皆與楚北毗連尤爲扼要之地張芾

已委臬司惲光宸前往會同該護鎮道等籌辦張芾
著仍遵前旨馳往督率調度省城重地陳孚恩與陸
元烺等仍當全局籌畫勿稍疏虞所調鎮江三板船
僅四隻雖有水師方翔統帶是否足資抵禦陸路及
江岸扼要處所亦必須派兵設礮互爲接應至安徽
省雖在江西下游而順流而下片帆直達蔣文慶已
在小孤山擇要設防諒不至顧此失彼現在河工軍

務均關緊要陸建瀛著酌量情形如須親往督兵調度卽星夜馳赴九江上游一帶扼要處所與張芾蔣文慶等相機布置並隨時知照徐廣縉琦善等合力進攻粵楚前調安徽之兵此時能否撤回並著咨商辦理江西之兵如能迎赴上游亦可助楚北聲勢不可稍分畛域

上又命軍機大臣傳諭徐廣縉常大滄曰逆匪竄入長

江攻撲武昌漢陽一帶前據常大瀆奏報後又逾數日未得續報徐廣縉自報岳州失守後亦無奏報是否因道路梗塞文報不通朕南望殷憂莫名焦灼現在武昌城守情形若何徐廣縉向榮是否統帶大兵繞赴湖北逆匪後隊如尙留踞岳州作何分路攻擊湖南兵勇數萬急宜趨赴前途或由江西繞赴武昌或取道蒲圻一帶將陸路竄撲武昌東門之賊翦除

並將賊踞之大洪山等處卽行奪回省城形勢旣壯
自能保固至漢陽切近省城情形危急必應迅速分
兵救應賊衆精銳不過數千餘皆裹脅現在聲稱數
萬大半烏合之徒總以合力攻剿爲第一要義若但
紛紛防堵則水陸四達防不勝防徐廣縉抵武昌後
當權衡全局一面憑城固守一面飛咨台湧督兵東
下並知會下游各省師船派江西上迎頭截擊河陝

北路之兵亦可由襄陽建瓴而下乘賊首尾勢分揀
選精銳併力撓勦勿但株守一隅毫無布置致賊匪
肆行無忌徐廣縉業已遷延於前若再任賊蔓延自
問當得何罪再昨已有旨切諭向榮該革員久歷戎
行尙屬可用因思蘇布通阿係向榮推引賽尙阿奏
令來營前據徐廣縉奏明已飭管帶川兵前進該員
如果得力可令與向榮會同督帶鎮將奮力衝鋒以

期克敵制勝軍營惡習爭功妒能最易誤事向榮與
蘇布通阿平素旣無猜嫌臨陣必互相應援不致掣
肘該大臣到營日久於諸將材質高下等差諒已確
加辨察尤當隨時激勵鼓舞使之齊心勦力勿蹈前
此覆轍師克在和此語當時刻銘心也至大營兵勇
雖多患在未能選練團勇一項尤不足恃急宜分別
良莠妥爲裁遣以整軍威而節濫費

上諭內閣曰軍興以來將兩年矣廣西瘡痍未復湖南
又遭塗炭近乃逆氛更熾擾及武昌漢陽所過郡縣
悉被蹂躪雖桂林長沙兩省城幸保無虞而我民之
遷徙流離亦已不堪言狀朕御宇三載未能安輯四
方俾我民咸登衽席深宮自省豈止寢食不安因思
軍營將帥及各督撫大員皆

先朝舊臣留爲保我子孫黎民之用際此時艱孔亟宜

如何同心協力奠我蒼生以輔朕之不逮朕爲吾民
請命不憚祈禱頻仍每閱軍報至地方被害情形朕
心如擣逆賊以左道煽惑愚民肆行搶掠荼毒生靈
實屬覆載不容神人共憤經我軍疊次殲戮外其兇
悍之賊不過數千大半皆褻脅之徒其甘心從逆者
無多揆之天道人心賊匪惡貫滿盈必當指日殲除
不致久爲民患朕不惜數千萬帑金藉資勦辦大臣

督撫等均當仰體朕心爲民除害行軍之道紀律爲先務須信賞必罰約束嚴明俾知有進無退人皆用命卽小勝小負亦兵家之常事總宜據實奏報不可稍有粉飾朕賞功罰罪悉以軍報爲衡儻有偏重偏輕何以令在營軍士知感知懼至團練鄉勇乃民間自爲守禦藉以保衛身家或各村自爲一團或數村共爲一團其經費應由紳董自行經理豈可官爲抑

勒且以守望相助之儔輒復紛紛調遣必致遷地弗
良轉滋流弊民間捐助軍餉好義急公朕方破格施
恩若地方官藉捐輸爲名苛派騷擾胥吏因緣爲奸
又何以安善良而昭激勸朕宵旰焦勞冀蘇民困吾
民一日不安朕心一日不釋前此被賊滋擾省分疊
經降旨令該督撫查明奏請蠲緩撫恤茲者岳州失
守擾及武昌漢陽一帶眷懷南服憂思益深若再令

照常徵納小民其何以堪著該督撫悉心體察被賊
地方分別蠲緩奏請恩施庶幾吾民於顛沛困苦之
時不至再受追呼迫切之累該大臣督撫等卽刊刻
謄黃徧諭閭閻其各仰體朕意速振軍心用殲羣醜
毋再因循玩泄致干重咎將此通諭知之

臣等謹案易謙卦六五曰利用侵伐蓋言在
上而能謙以征不服無不利也粵匪於

光天化日之下肆其臨張我

文宗顯皇帝命將出師大張撻伐

廟謨指畫不憚宵旰焦勞而

聖德謙沖猶以未能安輯四方引以自責

如天之度超越尋常宜乎

天討所彰將士咸知用命至團練戒其調遣捐輸恐其

騷擾

聖慮周詳無非欲保護黎民登諸衽席伏讀

諭旨曰吾民一日不安朕心一日不釋並

特命疆吏查明被擾地方蠲緩錢糧仰見

廛念民艱無微不至

綸音宣布有不感激而奮興者哉

二十六日

壬申

上命軍機大臣傳諭陸建瀛曰前因江防緊要疊次降

旨令陸建瀛酌度情形如須親往督辦卽著馳赴上游扼要調度現已數日未接湖北續報賊氛方熾難保不順流東下擾及沿江一帶此時武昌漢陽戒嚴恐無暇顧及江防江西兵力又形單薄朕再四思維湖北黃州蘄州廣濟等處沿江險隘所關甚重著陸建瀛迅卽馳往九江上游扼長江之險援應湖北卽爲江西安徽自固藩籬之計軍事變遷且夕不一必

須籌之於先庶免臨時倉猝措手不及朕聞黃州迤
南百二十里爲道士湫江面最窄有山可據地勢極
爲險峻應否於此地扼守與徐廣緝南路之兵互爲
聲援一面與蔣文慶張芾熟籌布置賊情詭詐必不
專由水路前來其陸路險要地方仍須兼顧毋致失
險沿江船隻必先收集以備我用毋爲賊匪所得

二十七日

癸酉

徐廣緝奏言據向榮報稱十一月

初五日行抵岳州各鎮之兵亦陸續到齊趕緊設法攻勦城外四面高處俱紮有賊營而後隊之賊在林子口土星港各處搶擄船隻順流東下已竄過岳州地面該匪水陸並下前路並無攔阻勢必徑撲武昌漢陽等處隨即派撥總兵常祿帶湖北官兵一千七百名王錦繡帶雲貴官兵一千五百名從小路馳往武昌以期繞出

賊前卽於初六日拔營前進向榮布置甫定於
初七日早出隊逼近岳州府城探知賊船已經
開動督帶各隊兵勇趕緊進攻城內賊匪業已
紛紛逃竄兵勇登時搶上擒殺數十名追趕二
十餘里因該匪大隊業已去遠卽在冷水鋪紮
營此向榮追剿之兵也其餘福興玉山各隊在
向榮之後蘇布通阿等又在福興之後經臣疊

次嚴札催進總未能迅速趨行查賊匪自到岳
州一路土匪裹脅不少其由旱路走者不過三
四千人馬匹甚多我兵步行勢難趕上餘匪俱
從水路順流而下所有船隻盡爲賊擄兵勇轉
無船可渡向榮於初八日督率各隊緊追初九
日匪已竄至蒲圻該處本有官兵二千名守禦
因省城緊要調回城中僅有兵四百名賊衆大

至兵不能禦以致失守知縣周和祥罵賊不屈
被戕甚慘賊匪一過卽竄大兵分起趕上距賊
總有五六十里以致不能撓剿其水路之賊沿
江而下竄撲漢陽郡城失守聞信之下憂憤難
名查武昌漢陽一江對峙該匪旣踞漢陽則武
昌情形極爲危急此時追剿之兵計已齊到武
昌必須設法水陸並進方可力籌攻剿臣在長

沙於十五日起程行抵湘陰據報巴陵縣屬土匪晏仲武勾串長髮逆賊招匪二千餘人沿途劫掠意在阻截糧道副將巴圖護解餉鞘至新牆地面已被該匪圍搶臣隨卽派副將鄧紹良總兵阿勒經阿帶兵一千餘名前往剿辦該處係糧餉經由要道且岳州當殘破之餘文武尙未知下落設或更滋他變所關非細必須將此

股勦滅南北方可無梗臣隨營之兵僅及千名
現再趕調弁兵相機前赴岳州督勦斷不敢再
有遲延自干重咎至岳州失守該文武聞警先
潰實未聞有帶兵迎擊之事現在該府縣如何
下落尙未據稟報而先期逃散已無疑義相應
請

旨將岳州府知府廉昌巴陵縣知縣胡方穀岳州營參

將阿克東阿一併按律治罪以肅官守臣現暫
住湘陰探明賊匪如由漢陽北竄卽須由荊州
上流馳往督辦又無庸卽赴武昌匪勢潰散四
出一時實無把握辜負

天恩無任戰慄隕越之至奏入

上命軍機大臣傳諭徐廣縉台湧羅繞典張亮基略諫
章常大瀉曰岳州爲南北咽喉該匪旣紛紛竄去卽

應趕緊收復著卽由湖南酌調文武大員來岳州駐紮分兵固守堵賊回竄之路萬不可再有疏失漢陽與武昌僅隔一江逆匪旣踞漢陽則武昌更形危急省垣重地且爲南北關鍵四通八達之區所關甚鉅著徐廣綰帶領南省追兵星速至漢陽武昌一帶合力攻剿常大瀄雙福當督飭在城文武竭力守禦並與城外救援各將密商內外夾擊萬勿株守城中一

籌莫展致誤事機土匪晏仲武勾結逆賊圍搶餉鞘
該大臣業經派委鄧紹良等帶兵勦辦此股匪徒諒
不難剋期殄滅現在楚北軍情著徐廣綰隨時飛咨
河南江西安徽江甯各督撫準備堵剿三面圍擊不
可任令竄逸復致滋蔓難圖台湧駐紮荊州據江上
游著一面擇要防守無令股匪竄入仍一面派委得
力水師兵船順江直下應援武昌毋稍遲誤

上又命軍機大臣傳諭陸建瀛楊文定蔣文慶張芾曰
前因江防緊急疊諭該督撫等迅籌防剿昨復諭令
陸建瀛馳往九江上游扼險守禦現在賊匪撲入漢
陽沿江下游地方在在堪虞情形十分緊要著陸建
瀛酌帶江南水陸官兵馳赴上游與徐廣縉常大瀛
等合力夾擊江防利用火攻務將槍礮火箭火罐等
件配帶齊全以期應用尤須派帶得力將弁毋得以

庸懦濫充江蘇安徽江西一帶均當亟爲設備自固藩籬著楊文定蔣文慶張芾妥籌布置互相應援至陸路各要隘尤恐有土匪勾結並著一體嚴防毋致稍有疏失

上諭內閣曰岳州文武等當賊未至先自逃散並未帶兵迎擊不料該文武等昧良喪心一至於此除已革提督博勒恭武由該大臣迅速查奏外岳州府知府

廉昌巴陵縣知縣胡方穀岳州營參將阿克東阿均
著先行革職交刑部按律速議罪名具奏蒲圻縣存
兵僅四百名賊衆大至以致失守知縣周和祥罵賊
不屈被戕甚慘不愧守土之官嘉獎之餘實堪憐憫
周和祥著賞加道銜照道員例賜卹並於蒲圻縣建
立專祠以慰忠魂

二十九日
乙亥陸應穀奏言欽奉

諭旨飭令署藩司鄭敦謹馳赴信陽州一帶會同南陽
鎮臣柏山扼要籌辦防堵臣查南陽距信陽六
百餘里相離窈遠往返咨商恐於事機有誤可
否仰懇

天恩飭令署藩司鄭敦謹專辦信陽一帶柏山專辦南
陽一帶似於事體有裨此時省城應辦軍火錢
糧並應行料理事宜均經臣次第籌畫俟布置

略備臣卽馳赴南陽查看調遣嚴密堵截計署
撫臣琦善與直隸提臣陳金綬不日到豫再行
商辦一切抑臣更有請者賊氛甚熾南省處處
堪虞設順流直下九江安慶難免騷擾應請

飭下徐廣縉統帶大兵繞至武昌下游遏其南竄並
諭令琦善陳金綬分駐南陽信陽遏其北竄責成向榮
帶兵跟追合力會剿不難一鼓殲滅矣奏入

上命軍機大臣傳諭琦善陸應穀曰南陽信陽相距六百餘里自應分路籌防鄭敦謹著仍遵前旨赴信陽州一帶防堵其南陽一帶卽著柏山專辦琦善未到任以前所有籌防應辦事宜著陸應穀妥速辦理琦善陳金綬現已起程到河南後應如何扼要駐紮及分撥進剿之處著琦善等體察情形相機籌辦總期內資保衛防剿兼施方爲不負委任

上又命軍機大臣傳諭徐廣縉台湧羅繞典張亮基常
大瀄駱秉章曰昨據徐廣縉查奏岳州失守情形與
漢陽相繼失守當有旨令該大臣迅赴武昌一帶與
常大瀄內外夾攻並令台湧一體設法應援細閱徐
廣縉摺稱向榮出隊偪近岳州城內賊匪紛紛逃竄
追趕二十餘里而岳州府縣如何下落仍未據探確
實該大臣近在湘陰於逆匪突入岳州有無頭目在

內其大隊係何匪督領竄出之後是否尙有餘匪在城占踞向榮一路追勦在後之福興玉山蘇布通阿等何以不將岳州收復賊旣遠竄則文武員弁存亡應有確信何以仍無稟報且稱該匪大隊去遠何以又稱趕調弁兵前赴岳州督勦是岳州之應否攻勦抑已收復該大臣尙無聞見奏報均未明晰至漢陽相繼失陷並無月日及詳細情形究竟現在逆匪分

爲幾股其陸路由蒲圻咸甯與水路沿江而下之賊
作何分合係何頭目統帶武昌省城係十二日被攻
十九日報到至今旬餘未得續報朕心焦灼難言逆
首洪秀泉楊秀青馮雲山蕭潮濱羅亞旺等是否確
在賊營何賊分撲武昌漢陽現在賊衆多寡漢陽城
守文武如何下落該匪陷漢陽後是否又竄他處該
大臣統率全軍兼轄兩省自應通籌兼顧勿再遲緩

失機著卽確查一一具奏本日已明降諭有賞給向榮提督銜令其幫辦軍務該員經朕破格加恩棄瑕錄用自必逾常感激奮起圖功所有武昌一帶勦賊事宜卽著責成向榮以專委任徐廣綰仍親督大兵由間道繞赴武昌下游扼定該匪去路必須水陸並剿勿令該匪再行奪險占踞仍與向榮渡江之軍併力攻擊漢陽之賊琦善已馳赴河南陸建瀛亦溯江

迎擊該大臣等三面攻勦定可立殄羣兇湖南賊匪
與各縣小股土匪著責成張亮基鮑起豹盡數搜捕
並確探岳州賊匪如未盡竄卽嚴飭將弁趁其攻擾
湖北之時趕緊兜圍迅速收復此舉最爲緊要湖北
荊州一帶雖有台湧防堵尙覺空虛著羅繞典揀帶
得力文武員弁兵勇馳赴襄陽與荊州水陸各兵表
裏密防遏賊西竄俾不得由漢江北駛則徐廣縉向

榮援救武昌漢陽之兵可資得力丁憂侍郎曾國藩
籍隸湘鄉現聞在籍其於湖南地方人情自必熟悉
著該撫傳旨令其幫同辦理本省團練鄉民搜查土
匪諸事伊必盡力不負委任

上諭內閣曰已革廣西提督向榮自抵廣西軍營節次
剿賊獲勝雖間有挫衄而每遇接仗尙能身先士卒
本年桂林長沙省城先後被圍向榮均有守禦之勞

現在逆匪攻撲武昌亦經向榮先派常祿王錦繡帶兵赴援並親督兵勇追至蒲圻福興玉山蘇布通阿等皆出其後是向榮督兵剿賊雖未見成效究屬老於行陣臨事尙知機警該員前因規避獲咎因念將材難得朕旋卽加恩停其發遣命赴湖南軍前帶罪立功經徐廣縉派令總統諸軍昨又降旨剴切訓諭令會同蘇布通阿共籌剿賊事宜並諭徐廣縉將此

旨宣示該員具有天良諒必知感知奮朕復博稽衆
論皆以向榮屢保危城緩急可恃宜專委任以重責
成與朕所見適相符合向榮卽著免其發遣並賞還
提督銜幫辦軍務提鎮以下悉聽節制迅卽統帶大
兵馳赴武昌解省城之圍並杜賊奔竄之路凡湖南
軍營得力將弁並准酌量檄調來營以備差遣向榮
經此次破格任用宜如何感恩圖報果能迅掃妖氛

卽可懋邀恩賞儘始終不知奮勉朕惟有執法從事
決不妨容懷之勉之

同日

上命軍機大臣傳諭葉名琛勞崇光曰賊匪肆擾自粵
而楚已逾兩載現復竄入岳州漢陽擾及武昌疊經
降旨令徐廣縉統率大兵繞出賊前會同毗連各省
之督撫三路兜剿因思賊起粵西沿途裹脅固多而

首要各匪總以粵西爲巢穴大股出巢其老弱必不能悉數遠出且難保無渠魁踞巢爲黨與歸竄地步前據勞崇光奏鬱林賊匪剿除殆盡南太一帶亦漸就肅清而伏莽尙多若不及早搜捕恐貽後患著葉名琛勞崇光會同密查賊巢所在及賊匪餘黨合力搜捕毋令一名漏網其有縛獻賊黨者免罪其親族家屬縛獻者免連坐縛獻首要者予重賞或雜伏良

民之中紳士義勇及平民縛獻或密行報官者分別
優獎並諭令地方官嚴查保甲勿因逆匪遠竄稍涉
大意緝獲各犯嚴行審究首逆及著名賊目姓名有
無僞託並飭屬密訪孽種墳墓現在何處盡行掘發
以銷逆燄而除戾氣